

# I CARAGUOI

SCHERZO

DI

P. G. N.



VERONA 1821

TIPOGRAFIA DI PIETRO BISESTI  
*Editore*

B<sup>c</sup> 17.8.78 <sup>2</sup>

## I CARAGUOI

---

Che i diga quel che i vol, mi no ghe penso  
Se i me trova de gusto alquanto strambo!  
Tanti altri preferisse la polenta,  
Chi el vin, e chi i oseletti,  
Chi el formaggio, e chi la zucca  
A qualunque piatanza più gustosa.  
Mi mo go un' altro genio  
Che solo preferisso  
E solo stimo e amo  
E continuamente bramo  
Averghene a magnar in sazieta;  
Quei famosi  
Quei gustosi  
Piacevolissimi  
Amabilissimi  
Che se trova in Venezia, Caraguoi.

Che se il ferro mi magnasse  
Anca quel voria passasse.

Se nel seguito disè,  
El palà go stravagante  
In aver tanta passion  
Per un cibo, che no bon  
Dalla zente de perfetto  
Vantà gusto è giudicà;  
Go la difesa quà:  
E l'è la massima  
Antica e vera,  
Che va adusendo  
E va asserendo  
Le persone tutte quante  
Per un cibo troppo spante,  
Che a pochetti in genio dà;  
Bon e gustoso sol ze  
Quel che aggrada e diletta el palà.

Se po innoltre li sprezzè  
Perchè i zè troppo abbondanti;  
I mii cari saverè,  
Quella roba che abbondante

Nè dispensa la natura ,  
 No la ze minga per questo  
 La più vil, la più cattiva;  
 L'è de certo la più bona  
 La più cara e la miglior.  
 Che le robe poco scelte  
 E più quelle che fa mal,  
 La natura come mare  
 Amorosa e penetrante  
 La le dispensa e dà  
 In poca quantità.

E po dopo se li magna  
 Le persone poverette,  
 Che no pol mettersse in bocca  
 Nè capponi nè polpette;  
 No la zè minga una prova  
 Da formar assioma giusto,  
 D'esser cibo insipidissimo  
 Privo affatto d'ogni gusto,  
 Perchè i mii cari  
 Diressi forse,

Che un miserabile  
 Un omo povero ,  
 No ga quel gusto  
 No ga quel genio  
 Che ga un signor ?  
 Se in un gran erròr ;  
 Perchè ho sentido  
 Da tutto el mondo  
 Narràr che i ricchi ,  
 Con tanti cibi  
 Scelti e diversi ,  
 I a reso el gusto  
 Falso incantà ;  
 E l'è la verità.

L'esempio mi ve adugo de un signor  
 Da mi ben conossuo ;  
 Che un zorno avendo fame  
 El s'ha portà in cusina  
 Dove bogiva i risi  
 Drento dell'acqua schietta ;  
 Per esser po conzai

Con bottiro e con formaggio.

Lu, senza ricercar come che i fusse,

L'ha chiapà in man la cazza,

E su d'un piatto avendone svodà

A magnar l'ha scomenzà.

Se avessi mo sentio, amici cari,

Le lodi ch'el ga dà!

Disendo ch'el so cogo

La più bona manestra gà mai fatto;

Tutti el li ga slofai

E debotto el magnava ancora el piatto.

St o caso che ve conto

Se va molto accordando

Co quel che digo mi.

Perciò, se i caraguoi

No va i ricchi magnando,

No i sa da disprezzar.

Voleu po prova aver che sta vivanda

Ze molto delicata e necessaria?

Prova se ghe pol dir, l'ayer un scorzo

Durissimo tra i duri, che per diana,  
 Li mantien vivi nella panza ai pesci,  
 E li salva dai colpi in le borasche,  
 Avendo innoltre un piatelletto in testa  
 Come nu altri avemo la barretta.  
 Da sti ripari, certo delicati  
 Ze i caraguoi; e se po i ga bisogno  
 De conservanza, l'è questa la prova  
 Che necessarj i zè. Prova più chiara  
 Euclide no la gà nè i so elementi.

Ma che difesa cerchio!

Cossa me salta in testa!

Che par che i caraguoi

No l'abbia manifesta?

No se pol dir difesa

E veder matta e spanta,

Co ze la so stagion

Venezia tutta quanta?

Vardè quante donette e quanti fioi

Vende dei caraguoi



Sigando per la strada,  
 Bovoli tondi e longhi;  
 E se i li va via dando  
 Ze segno che la zente i va magnando.

Quando vien la quaresema pò andè  
 Sulle zattere, e quanti vederè,  
 Che magna caraguoi  
 Omeni done fioi,  
 E innoltre signorini  
 Dell' uno e l' altro sesso.  
 Andè verso i zardini  
 E vederè l' istesso.

Cossa voi dir perciò?  
 Che scusa granda gò  
 Se assae a mi i me piase,  
 Quando ghe ne ze tanti  
 Dei caraguoli amanti.

E questa ze per certo  
 Non prova, ma provona,  
 Che i caraguoi se possa  
 Dir una cossa bona.

Sappiè che tante volte anca mi vago  
 Per la strada d'EUGENIO passeggiando,  
 Insina sulla motta dei zardini  
 No volendo nissun in compagnia.  
 Me compro dò e più soldi dei mii idoli,  
 E col so bravo aghetto  
 I curo, i cavo fora e me li magno.  
 Nè el gusto mi ve digo che ghe trovo  
 Perchè l'è cussì grandò  
 Che de dirvelo ben saria incapace.

Si per mi no ghe spasso più bello  
 No ghe gusto più grandò de questo.  
 Lasso pur che tutti vada  
 A veder i ballerini,  
 A sentir sonar concerti,  
 A ballar in telle feste,  
 A trovarse la morosa,  
 A zirar per el ridotto,  
 E cercar la so rovina  
 Nel zogar alla rollina.

Andè in estasi nell'opere,  
 Divertive pur in maschera;  
 Pianzè pur nelle tragedie,  
 Ridè pur nelle comedie.  
 No ghe penso, no me importa,  
 No ve invidio in verità;  
 Che al mio spasso, al mio diletto  
 El maggior no no se dà.

Tantè volte gò la smara,  
 Tante volte son afflitto,  
 Tante volte son svogià,  
 Spesso perdo l'apetito,  
 Go la mente alquanto fosca,  
 Alla notte poco dormo;  
 Saveu qual ze el mio rimedio?  
 El specifico infallibile?  
 L'elezir arcì perfetto?  
 Che me torna in sanità?

Senza andar dal moralista  
 Che me esorta alla costanza;  
 Senza andar dal farmacista

Che me purga la mia panza;  
 Senza darghe una gazzetta  
 Al dottor per star in dieta;  
 Con pochi soldi  
 De caraguoi;  
 Con un aghetto  
 Per ben curarli;  
 Torna el diletto,  
 Torna la pase  
 Drento el mio cor.

Quando la stagion ze de carneval,  
 Vedè Venezia tutta  
 Buttarse fora per andar in maschera.  
 Là maschere in bautta,  
 Lustrissimi, testoni, dominò;  
 Trufaldini, schiaoni, tirolesi,  
 Pagiazzi, poveretti,  
 E là pampalughetti  
 Co quelle maledette campanelle,  
 Furlani, contadini,  
 Chiozzoti, burancele,

E tante e tante de graziose e brutte  
Che vigneria doman a dirle tutte.

Mi el più che fazza ze nel dopo pranzo ,  
Magnando caraguoi ;  
De andar in piazza a darghe una vardada ,  
Ma pericol no ghe che mai ghe vada .  
Perchè el bordello , el chiasso ,  
A mi nol m'ha mai piasso ,  
E po bisogna spender dei quattrini ,  
E da sti tempi i soldi  
A guadagnarli ghe vol gran fadiga .  
Se in maschera se andasse senza volto  
Anca i compatirave ;  
Che la zente dirave ,  
Vardè come quel tal ze ben vestido !  
Come ben el sustenta quel carattere !  
Cussì della fadiga e della spesa  
Se saria in qualche modo compensai .  
Ma che i daga le lodi , e no se sappia  
Chi sia quel che le merita , per bacco ,  
L'è un gusto da no darghe gnanca un bezzo .

Se a far sto putelezzo  
 M' avesse da ridur,  
 Sentì qualo sarave el mio vestiario;  
 Che ho in qualchedun lodà;  
 Saria còverzer tutta una velada,  
 Sott'abito, tabaro, calze, e scarpe  
 De caraguoi... Ridè, minchioni  
 Qualo sia el vero gusto no savè:  
 Come porta el guerrier  
 Per mostra de valor,  
 L'arme e l'insegne dei nemici vinti;  
 Cussì mi porterave  
 Dei caraguoi che go magnà le spoglie;  
 E del valor de mia bocca  
 Eccelsa mostra al popolo farave.

Cossa gaveu Malgheritina mia  
 Che ste si ingritolia? Ah gavè freddo!  
 Toleve in un scaldin  
 Un pocheto de fogo;  
 Oppur deghimo lego  
 Che la se senta del fogher vicin.

*I Caraguoi*

*B*

Sappiè che la stagion più tormentosa  
 Ze a mi, come a ognun credo, l'inverno.  
 Prima, perchè poltron son per natura,  
 E lu me aumenta la poltroneria,  
 Po, el vento, la neve, el freddo, el giazzo  
 Disturbi insofferibili ne porta.  
 Eppur a mi el diventa primavera  
 Solamente co penso, che l'inverno  
 Ze la stagion che vien i caraguoi.

Cossa Bortolo discù?

Che ze in tola la maestra?

Che ze ora de magnar;

No me fazzo no pregar

No dubitè compare

Che al son de sto comando

Me vanto de ubbidir.

Son lesto come un gatto

E pronto a comparir.

O cospetto cossa vedio

Resto un palo dal stupor!

Oh sorpresa inaspettada  
 Che m'arecca batticuor!

Lassa pur compare mie  
 Che te daga do basazzi,  
 Ti li meriti per sbrio;  
 Ma el gran omo che ti ze!

Quà se vede ben in fatto  
 No ti cessi mai de amarme,  
 Che ti ha i risi ordinà  
 Coi caraguoì de farme.

che cosa squisitissima!  
 O che cosa stupendissima!  
 Mo che balsamo divin!

ossa disela sior conte?  
 Ze eccessivo il mio lodar?  
 Ma nol posso minorar.  
 La se asserta, la me creda  
 Che no posso  
 Drento el gosso  
 Tignir fermo



Se no me infermo,  
 Se no mi schioppo,  
 Se un poco troppo  
 Lasso el lodar.

Come un moroso che l'amata bella  
 Ga in testa a tutte l'ore  
 Se l'agisce; se el pensa, e se el discorre.  
 I caraguoi me ne l'istesso a mi  
 L'è quel pensier che continuatamente  
 El dì, e la notte, m'occupa la mente.  
 Ma el moroso che ze pien de riguardi,  
 Mai nol se sente  
 Parlar della so bella un sol momento,  
 Mi che nessun ghe nò  
 Lodo sempre el per mi maggior contento.

Deme quà, deme da bever  
 Impenime ben el golto;  
 Me lo bevo in un sol botto  
 Che gho proprio la gran sè.

Benedetto sia anche el vin  
 Vero liquor divin!  
 Se i caraguoi ze ambrosia  
 El vin ze certo nettare;  
 Do cose amabilissime  
 Do cosb gustosissime  
 Che no ga paragon.

Varda varda iu quante forme  
 Ze qua cotti i caraguoi!  
 Ma compare mo accertevè  
 Ve son grato somamente;  
 M'avè fatto una sorpresa  
 Da mi certo no aspettada.  
 Vu m'avè ben invidà  
 A vignir a disnar quà:  
 Ma mi no saveva  
 E 'fermo credeva,  
 Ch'è il solito pranzo  
 Avesse a seguir.

Ma invece vu savendo el gusto mio  
 Qual sia la mia passion;  
 Gavè con attenzion  
 Per mi fatto un disnar de caraguoi;  
 E per po farme  
 Maggior sorpresa, avè nell'invidarme  
 Specificà delle piatanze in moda,  
 Che per diana e per sbrio  
 Le posso dir, l'abborimento mio.

O che se stramalignaza!  
 Go la gola tutta arsia!  
 Presto presto Zamaria  
 Dame dame quel fiaschetto,  
 Mo che vin arciperfetto!  
 Mo che gran divinità!

Deme in quà quei caraguoi  
 Che ze fatti in potacchietto.  
 O co boni! o che diletto  
 Che in magnarli prova el cuor!

Mi me piase i tondi e i longhi ;  
 I me piase soli e uniti ,  
 I me piase fatti fritti ,  
 Fatti in tecchia come i fonghi ;  
 E co i è cotti drento el brodo  
 A magnarli molto godo,  
 Anca in sopa i me diletta ,  
 Tagiai a tocchi in le polpette ,  
 Messi drento dei bodini ,  
 Dei pastizzi , e dei ragù.  
 I me piase assae nei risi ,  
 Nelle paste , e nelle fave ,  
 Nella lente , e nei fasioi ;  
 Ed in somma in ogni forma  
 Mi me piase i caraguoi.

Sappiè amici che no posso  
 Sentir zente che i disprezza ;  
 Mi li giudico somari  
 Da ligarghe la cavezza.  
 Quando sento qualchedun  
 Che de loro parla mal ;

Me vien suso una tal bile ,  
E bisogna vaga via ;  
Che se avesse da restar  
Mi ve zuro i coperia.

Un zorno mi so andado da un signor  
Che aveva galleria  
De testacei rarissimi e superbi.  
E come son curioso per natura  
Li andavo via osservando ;  
Li andavo esaminando ,  
Ma no vedevo in tanti el caraguol .  
Riflettevo tra mi , che certo quella  
Galleria , dir no se poteva bella  
Se logo no gavea sto testaceo .  
Ma come mi temevo ch'el ghe fusse  
E de no esser bon de ritrovarlo ,  
Cussì credendo aver mal giudicà  
Prontamente al padron go domandà :  
Se nella so raccolta  
Ghe gera el caraguol ? El me risponde  
Ridendo come un matto ,

Che razza de domanda go mai fatti!

Ricercar se abbia luogo

Tra testacei sceltissimi e rarissimi,

Un testaceo che ze dei più vilissimi?

No ve digo se m'ha montà la bile

A sentir sta risposta;

Volevo darghe un pugno

Ma m'ho tignuo; e tolto el mio capello

Senza ne salutarlo e dirghe guente

So andà zo delle scale de reppente.

Mi me sento un certo caldo

Che no posso star quà saldo;

Par che gabbia in sen del fogo l.

Dame quà compare mio

Ch' el fiaschetto ze finio,

Dame quà dell' altro vin.

Destrigheve, deve pressa

Che lo destua

Prima ch' el cressa.

Oe senti cosa me salta  
 Nella testa in sto momento,  
 Un composto voi formar,  
 E veder se bon el sia;  
 El ze novo, nè l'è stado  
 Da nessun certo trovado.

Deme quà mio Zamaria,  
 Za permette mio compare,  
 Deme quà quel bocalon  
 Cussì grandon;  
 E del vin meteghe drento...  
 Impenilo più de mezzo...  
 O cussì che va benon.

Deme pò mii cari fioi  
 Deme quà quei caraguoi...  
 No de questi babuin  
 Che ga ancora el scorzo adosso:  
 Ma de quelli che ze stai  
 D'ogni impazzo ben curai,  
 Che voi metterli nel vin.

Presto Checchin

Dame un sculier;

Voggio missiarli

E po magnarli.

O per bacco bacconissimo

Che composto eccellentissimo!

Mo che cibo imparegiabile!

Che vivanda inimitabile!

Ma che cossa pregiatissima

Amabilissima

Graziosissima

Arcibonissima

Stradearcipreziosissima!

Vada al diavolo i pastizzi,

Anca vada le persone

Che li inventa e li compone.

Proprio i ze da dar ai stizzi,

Quando i vien a paragon

Co sta roba che ze quà.



Chi sarà mai quel muso capace  
 De far un piatto cussì eccellente?  
 De far un piatto cussì gustoso?  
 De far un piatto cussì famoso?  
 Prima el so termine averà el mondo  
 Che vegna un uomo tanto profondo!

Si per diana ve lo zuro,  
 Ze impossibile  
 Impossibilissimo  
 Ghe sia testa cussì granda,  
 Ghe sia mente sì divina,  
 D'inventar una vivanda  
 Che la possa pareggiar.

Via amici uniti  
 Tutti cantemo,  
 Forte cighemo;  
 Evviva evviva  
 I caraguoi,  
 Unici eroi  
 Del bon magnar,

Evviva ancora  
Dopo cighemo,  
Evviva el vin  
Liquor divin  
Che no ga par.

Ma vardè se mi no posso  
Dirme un omo fortunà!  
Che fortuna la ze certo  
L'esser nato in sta città.

Perchè se fusse  
Nato in paesi  
Messi lontani  
Assae dal mar;  
Che mai el so pesce  
Pol capitar.

No gaverave  
Savesto mai  
Cossa che fosse  
El caragnol,  
Che al mio palà  
Tanto ghe pol.

Nò dubitar perciò patria mia cara  
 Da abbandonarte mi capace sia;  
 Pur troppo me saria  
 La lontananza lagrimosa e amara.

Se al caso fusse  
 Lontan da ti,  
 Mi pianzerave  
 La notte e il dì.  
 Nè saria longa  
 La vita mia,  
 Dal dolor certo  
 Mi moriria.

Vedo che penitenza  
 Me ze l'istà, l'autunno, e primavera!  
 Figureve se senza  
 Caraguoi, avesse a star la vita intera,  
 Quanto granda saria la mia passion!

Ma de diana el localon  
 Cussì presto ho terminà?...  
 ..

E si el gera tanto pien!...  
Eppur tutto l'ho magnà.

Presto presto dunque dame  
Dame quà dell' altro vin;  
Via destrighete in bon ora,  
Via destrighete sassin.  
Dame ti quei caraguoì  
Che in boccal cazzarli voi;  
E formar quella pìatanza  
Che in bontà qualunque avanza.

Mo che caldo! Averzi fora  
E le porte e le finestre;  
Fè che vegna un pocchettin  
De freschetto ventessin.

Ah perchè ze de febraro  
No volè? Fe pur de manco  
Che mi in colera no vado...  
O cospetto de un salado!

Varda varda quanta zente  
 Vol magnarme i caraguoi!  
 Fève suso fève suso  
 Restè indrio se no ve bruso...

No ve dago no per diana  
 No ve dago de sta roba,  
 Se ve vien fina la goba,  
 Che la magno tutta mi.

Cospetton de dia de di,  
 Via fermeve no se chiasso;  
 Cossa ze sta torse spasso  
 Con un uomè come mi?

O che freddo malandrin!  
 Oe porteme el mio tabarro;  
 Deme quà dell'altro vin,  
 Che me scalda e me ristora.  
 Andè tutti alla malora  
 No ste a far sto diavolèzo,  
 Mi no voggio sta romar.

Cossa diseu dottor ?

Che tutti magna e lase

Co la so santa pase ?

E che nissun se move ?

Sarà dunque la mia testa

Che va a torno come un corlo

Perciò fioli no abbademe ...

Oe compare qua sporzeme

Davicin quei caraguoì.

El mio aghetto tiro fora ;

E cercando voggio andarli

Co la quiete ben curarli.

Mo vardè che stravaganza !

No so bon trovar più el buso !

El mio ago sbrissa fora ...

No l'è bon de andar più suso ...

No l'è bon trovar la strada ...

Vado rischio farne mal !

*I Caraguoì*

C

No crederia che fiapo

El fusse diventà?

L'è un ago quasi novo,

L'ho poco dopera?

Mo che caso! che disgrazia!

Che successo inaspettato!

Mi debotto pianzerave

Me anderave a sotterrar.

Non essendo più capace

El mio ago de inspirar.

Senti quanti campanelli!

E violini e violoncelli!

Quante trombe e chittarini!

Quanti oboe e flautini!

E spinette coi fagotti!

E tamburi coi subiotti!

Clarineti, e cornamuse!

Voci d'omeni confuse!

Corni, pive, e contrabassi!

Par che proprio piova sassi  
Dal sussurro che quà ze.

Varda el zorno che se offusca!...

Se ritira el sol in casa!...

Se coverze tutto el cielo

D' un oscuro e negro velo!

Ecco ecco che trema la terra!

Ogni cosa se rompe e se atterra!

Senti senti che vento furioso!

Tutto quanto el rebalta e el tra zoso!

O che toni o che lampi tremendi!

Par ch' el mondo se spezza e s'incendi!

Che tempesta dal ciel vien cadendo!

La va tutto ruinando e struggendo

Deh salveme la mia testa

Da sti subi arcicutissimi

Dei serpenti, dei dragoni!

Da sti urli arciorendissimi

Delle tigri, e dei leoni!



Corri corri scappa scappa  
 Presto presto salva salva ;  
 Che premura mai abbastanza  
 No ghe ze a salvar la panza  
 Se neghemo , se neghemo  
 Se più fretta no gavemo.  
 Oh che onde stragrandissime !  
 Le salisse ai sette cieli !  
 Lesti lesti mii fradeli  
 No se stemo più a vardar  
 E' mettemose a vogar.

Voga voga para avanti ,  
 Schiva schiva tutti i scoggi ...  
 Mo via fioli deve fretta ,  
 Che debotto sta barchetta  
 Se fracassa , se sconquassa !...

O che scuro maledetto !  
 Oh che notte tenebrosa !  
 No so più se vada dretto  
 Indrio passo o per traverso ...

Si per bacco che m'ho perso  
Dove vadio no lo so.

Chi ajuto, assistenza  
Soccorso me dà?  
Chiapeme  
Salveme  
Per carità.

In piè de mantegnirme  
Più certo no so bon...  
Sosteneme per pietà...  
Ah per diana che sbrisson!...  
Ah che in acqua a tombolon  
Si per dia che son cascà.

Son in acqua chi me chiapa  
Chi assistenza me vol dar?  
Mi me nego certamente  
Che son proprio in fondo al mar.

Chiamè Nettuno

Chiamè Palemone ,

Quà vegna Tetide

E Galatea ,

E ogni altra Dea

E ogn'altro Dio

Che i me chiapa

Ed in salvo me conduga ,

E pulito po i me suga.

Fatto questo voi che i corra

A ricercar

In fondo al mar

I caraguoì più grossi ;

E in la real cucina

Del Dio della marina

Farli perfettamente cusinar ;

Che dalla abua paura

Me voggio ristorar.

~~Varda varda le Balene~~

E le foche ed i Dolfini

Che me vien a far inchini.

Varda varda il pesce sega;  
 Varda varda el pesce can,  
 Che me vol basar la man,  
 No me fido gnente affatto  
 Che sarave molto matto;  
 Andè al diavol malignasi  
 No ghe penso no de basi ...

Varda come adesso i sbuffa!  
 I se tira i mustacchioni!  
 I me mostra i so dentoni!  
 E co mi taccar baruffa  
 I vorave si per dia ...  
 Corri seampa corri via.

Presto presto in una busa  
 Ben profonda  
 Che me cazza, e che me sconda  
 A quei cani de bestioni,  
 Cussì grandoni!  
 Che me vorave  
 Far a bocconi

La mia mente se confonde  
 Come in mar se missia l' onde;  
 La mia testa z.ra z.ra  
 Proprio come un molinello;  
 O il cervello me delira ...  
 O più certo no so quello ...  
 Si per dia che a poco a poco  
 Se va el corpo mio alterando ...  
 Mi me vado deformando ...  
 Mi me cambio de natura ...  
 No go più la mia figura.  
 Cossa vadio diventando?

O co piccolo! o co tondo!  
 Che figura stravagante!...  
 A che adesso go capio,  
 Ben mi resto incocalio,  
 Deventà so un caraguol!  
 Mo rason mo si per bacco,  
 Mo rason ga, che disendo  
 Va, che avanti della morte  
 No se sa la propria sorte!

Chi averave mai credesto  
Che un omo  
Se deformasse,  
E diveniasse un caraguol?

Che accidente doloroso!  
O che caso lagrimoso!  
Che disgrazia penosissima!  
O che sorte crudelissima!  
Che tormento  
In sen me sento!  
A pensar sempre ho da star  
Drento el fango in fondo al mar.

Quanti rischi me persegue!  
Quanti pesci che me insegue!  
Vado rischio d'esser messo  
Anca mi in un caldieron  
E servir po da boccon.

Ma no è questa la passion

El tormento mio più grandò;  
 E credemelo mii fioli,  
 El ze quello che no posso  
 Magnar più dei caraguoli.

Che se magna i mii compagni  
 La ze azion che ben non và;  
 Po no i è cotti, e vado a rischio  
 De restar mi devorà.

Ghe sarave qualchedun  
 Che un rimedio me indicasse;  
 Per el qual mi ritornasse  
 Come gera prima al mondo?  
 Ad un omo sì profondo  
 Ad un uomo sì divin,  
 Ghe darave per so paga  
 Un boccal de caraguoi  
 Mescoladi con del vin.

Ma nessun me sente e ascolta;  
 E a soffrir sta cruda sorte

Convien proprio che me adatta  
Sin che capita la morte.

Vardè inoltre sta mia testa  
No la fa che andarme zo!  
Mo sta suso, mo sta dreta  
Mo sta suso maledetta...  
Mo sior no, no la vol star.

Che rimedio posso far?  
Pontellarla? Si per dia  
L'è un progetto da lodar.  
Oe un moral portè alla presta  
Che pontella la mia testa:  
Voggio far la staga su.

Mo che razza di malora!  
I occhi ancora  
Zoso me casca...  
Ah sicuro la borasca  
In sto modo m'ha stancà.



Ma per diana bacccherana  
 Che profitto de sto sonno;  
 Mi profitto si per bacco  
 Mi profitto d'esser stracco  
 Per cazzar lontana via  
 Quella gran malinc.nia,  
 Che mi provò a aver a star  
 Caraguol drento del mar.

Oe compagnime compare  
 Voi buttarme su quel letto...  
 E sporzeme el fazzoletto  
 Perchè suppia sto mio naso;  
 Recordeve ghe sia un vaso  
 Se me occorre... za capì.

E pò vu compare mio  
 Di svegiarme da quà un' ora  
 Promettemme, che mi voi  
 Terminar quei caraguoi.